



Il protocol da la Sinoda da l'onn 1778 cumenza cun quest import en il cudesch da protocols.

FOTOS AUGUSTIN BEELI

Funtauna da 10 000 sedutas sur 450 onns

La Baselia evangelica reformada dal Grischun ha festiva venderdi passà la finiziun d'in project che ha cuzzà tshintg onns. Ils historiografs Jan-Andrea Bernhard e Silvio Margadant han ordinà 35 000 registas da l'archiv sinodal e dal cussegl da baselia. Il material è accessibel en l'archiv da stadi.

AUGUSTIN BEELI/FMR

I saja la memoria istorica da la baselia chantunala grischuna, ha la presidenta dal cussegl da baselia, *Erika Cabenzli-Philipp*, ditg en ses bainvegns per l'occurrentza. Venderdi saira han persunas interessadas a l'istorgia ed a la cultura grischuna assistì ad ina pitschna festività. En la sala Brandis a Cuira han ses antecessur, *Andreas Thöny*, ed il responsabel per ils fatgs d'archivaziun dal cussegl da baselia, ser *Peter Wylder*, preschentà il project da transferir l'archiv sinodal en l'archiv da stadi. Quai è stà pussaivel cun in contract da deposit tranter la Baselia evangelica reformada dal Grischun ed il chantun. L'importanza dal project ha er accentuà la presidenta dal Cussegl grond, *Aita Zanetti*, cun sia preschientscha a l'occurrentza.

«Ils documents per part fitg custavels pon ussa servir a blers projects scientifics.»

Jon Domenic Parolini,
cusseglier guvernativ

quai ch'era en l'archiv. Igl è numnadamain ina funtauna d'infurmaziuns impurtanta per l'istorgia grischuna.

L'entschatta da l'onn 2022 è quest problem d'access damai ussa schlià. Ils 24 da december, gist sco regal da Nadal, haja ser *Jan Andrea Bernhard* surdà ad el il rapport final dal project, ha *Andreas Thöny* ditg en ses pled.

Elavurà 15 meters actas

Avant tshintg onns hai duvrà in stausch decisiv per avrir il stgazi. Las funtaunas eran avant maun, nagin n'aveva dentant ordinà ellas, nagin n'aveva gughegià da prender a mauns quella lavur. Ser *Jan-Andrea Bernhard*, professor titular a l'institut da teologia da l'università da Turitg ed enfin dacurt plevon da Vuorz-Schnaus, e *Silvio Margadant*, l'archivar da stadi ch'è i en pensiu avant diesch onns, èn stads pronts da manar il project cun il num «Ad Fontes».

Sco emprim pass han ins transferì ils 15 meters actas en l'Archiv da stadi. Il contract da deposit tranter stadi e baselia chantunala evangelica è stà la basa per sortir tut. La dimensiun da la prestaziun han ils preschents a la festività da venderdi saira pudì udir da divers referents. Tranter quels il directur da la cultura grischuna, cusseglier guvernativ *Jon Domenic Parolini*. «Ils documents per part fitg custavels pon ussa servir a blers projects scientifics», ha el ditg e rendì attent ch'ins na possia betg cumenzar baud avunda da far in bun archiv.

Igl ha duvrà 100 onns

Avant che pudair far las registas, vul dir far ina curta descripiun dal cuntegn da mintga acta, han ils dus istorichers stuì leger ed interpretar quella. Igl è ina premissa per avrir l'access. Il resultat final da «Ad Fontes» èn 7000 paginas sin palpieri en 10 ordinatur. Tut bain zavrà, classà e signà. Gia 1925 aveva il decan Jakob Rudolf Truog zavrà l'archiv sinodal e dal cussegl da baselia. El aveva rendì attent ch'i duvrass ina ulteriura elavuraziun detagliada. Pir 100 onns pli tard è il problem damai schlià e l'access garantì. Sco quai ch'il vicearchivari chantunal, *Silvio Decurtins*, ha explitgà, pon ins tshertgar mintga document sin il computer persunal tenor chavazzins. Ins po s'infurmar svel e nudar la signatura dal document giavischà. En la sala da lectura da l'archiv da stadi a Cuira pon las persunas interessadas lura prender a mauns l'original e studegiar quel. Sapientivamain n'hajan ins betg digitalisà mintga palpieri, ha *Silvio Decurtins* ditg, che quai fiss stà cumbinà cun in project bler pli grond ed intensiv. Prender a maun fisicamain il document è dal rest pli autentic che guardar quel sin il monitor.

Actas han midà domicil

L'archiv sinodal e dal cussegl da baselia evangelic cumpiglia 15 meters actas da la Sinoda retica dapi l'onn 1537 inclus ils cudeschs da protocol dapi il 1571. Lura datti era protocols ed actas da la sessiun evangelica e dal cussegl grond evangelic. Tut questas plunas documents han ins transferì il 2016 dal tshaler dal domicil da la Baselia chantunala evangelica, a la via Loë 60, en l'Archiv da stadi al Karlihof a Cuira. I n'è betg stà ina midada usitada e simpla. Il Cussegl grond da la baselia evangelica reformada ha lubì il 2015 per questa midada in credit da 200 000 francs sur trais onns ed il chantun ha contribuì ulteriurs 50 000 francs.

Cun las garantias e cundiziuns sco er in plan da termins ha *Andreas Thöny* pudì persvader lura dus historiografs d'instradar il project ed ir a la lavur. Il register existent dal cuntegn da l'archiv sinodal e dal cussegl da baselia na correspundeva absolut betg pli a las pretendias dal temp. Ni ils collavurats da l'administraziun da la baselia chantunala ni ils scienziads n'avevan ina dretga survista da



In import en il protocol da l'onn 1777.



Il Puntstag ha stuì fundar da nov

Jan-Andrea Bernhard (san.) ha explitgà intgins detagls da las actas e protocols ch'el e *Silvio Margadant* han elavurà. Da mintga protocol da las 10 000 sesidas dals 450 onns enfin 1940 han els fatg ina regista, vul dir in chavazzin cun curta descripiun dal cuntegn. Ils historiografs èn s'approfondids a moda acribica en quest temp, els han legì protocols scrits en latin, grec, ebraic e schizunt en sirc. E quai en scrittiras per part grevas da decifrar da scrivants e decans. La Sinoda retica è dal rest ina fundaziun ch'il Puntstag ha fatg l'onn 1537. En il stadi da las Trais Lias hai duvrà in urden administrativ che remplazzava il dretg episcopal. Entant che la confessiun veglia aveva gia reglè tut, han ins stuì definir per la nova mintga formalità administrativa, mintga casualia. Ins ha fundà ina sessiun, in cussegl grond confessiunal, ed in cussegl pitschen ecclesiastic, sco er la Sinoda, la radunanza dals plevons. En las actas da l'archiv sinodal sa chattan uschia per exempel las nominaziuns da preditgants, relaschadas ed autras tractandas da persunal.